

Weh Wi Ga Fi Seh

*Gi yu best tu weh
yu du tudeh!*

Shoa di Valentainz lov...tu yu dudu daalin ... plos tu wi Kriol langwij!

Hapi Valentainz Day tu evribadi, weda yu ga dudu daalin er nat! [Sohn pipl seh Valentainz; ada pipl seh Valentaimz.] Da di lov mont! Yu di feel it? Wel, wee da “Weh Wi Ga Fi Seh” ga dis fu seh: If yu tink yu noh ga nobadi fu lov yu, yu rang! Noh mata wat, yu ku lov op yuself! YES! Soh, how yu ku lov op yuself? How yu ku shoa yuself sohn lov? Dis da wan way Ah di shyaa wid unu, weh mee fain werk gud: **Stap rosh fu wan day. Sloa dong ahn smel di flowaz!**

Now, wans yu stap di rosh bowt lee bit, yu ga taim fi shoa sohn lov tu di Bileez Kriol langwij! Ih eezi fi laan fi reed ahn rait di Kriol langwij weh wi taak soh gud gud! Dehnya da sohn plays yu ku fain di standad spelin a di Bileez Kriol langwij:

THE REPORTER: Evri week eena **THE REPORTER** nyoozpaypa, reed dis aatkl. Da fahn di layt 1990s **The Reporter** di kehri dis aatkl. Tank yu!

“Weh Wi Ga fi Seh”

belmopanonline.com: Evri week eena di Kriol paat a di websait fu www.belmopanonline.com, yu ku reed “Weh Wi Ga Fi Seh.” Pahn tap, yu ku fain eezi eezi evri aatilk di goh bak tu 2008 pahn dis websait: Di dairek link da:

<https://www.belmopanonline.com/belizean-kriol-language>

501Academy (di Minischri a Ejukayshan websait fu lata mateeryal bowt Bileez ahn Bileez kolcha ahn risaach!). Wi tank MoECST fi put op di sekan edishan a di dikshineri pahn **501Academy** soh evribadi ku chek it owt:

<https://501academy.edu.bz/2025/01/10/belize-kriol-dictionary/>

Ih eezi fi laan fi reed ahn rait Kriol.

Silvaana Udz, Ed.D. da paat a di Kriol Langwij Groop a di Nashanal Kriol Kongsal a Bileez. Yu waahn shyaa er aks sohnting? Eemayl: sudz142@gmail.com Vizit: www.nationalkriolcouncil.org